

M A V R O C V M.

vitati studendum, omittimus. Nunc vero tota urbs frequentibus Arabum bellis adeo attrita est, ut vix tertia ejusdem portio incolas habeat. Sunt præterea in hoc territorio urbes minores, *Elgiumuba*, *Tenezza*, *Delgiumuba*, *Imizimizi*, *Tefrast*, *Agmet*, & *Hanimmei*.

*Guzzula*.

*Guzzula* regio ad Septentrionem Atlanti adjacet, ad ortum *Hexæ*. Mittit hordei magnam vim, habetque æris, & ferri fodinas. Oppida hic & arces vallo carent, pagi frequentes, ampli, divites, populosi.

*Duccala*.

*Duccala* regio ab Occasu à *Tensifto* fluvio initium capit, à Septentrione Oceano terminatur, à meridie fluvio *Habel*, ab Occidente fluvio *Hammirabits*. Paucæ in hac civitates muris cinctæ. Inter quas *Azafi* in littore sita, *Conte* à Gothis, & *Tib* ab Africanis exstructa. Sunt & hic *Elmedina* totius regionis caput, *Centapozzi*, *Subeit*, *Temaracost*, *Terga*, *Bulastivan*, *Azamur*, & *Meramer*. Est in provincia hac Mons viridis, qui lacum habet ejusdem nominis valde amœnum: præterquam enim quod plurimos & optimos nutriat pisces, consitus est in ambitu maximis arboribus, pinorum instar, in quibus infinita turturum nidulatur copia.

*Hascora* regio ad Septentrionem *Duccalæ* *Hascora* confinis est, ad Occasum finitur *Tensifto* fluvio, & ad Ortum fluvio *Quadelhabit* à regione *Tedeletes* discluditur. Oppida habet *Alemdin*, in valle quadam quatuor altis montibus cincta conditam: *Tagodast* in cacumine montis sitam: *Bzo* in monte itidem positam.

*Tedles* regio non adeo ampla est, ab Occasu terminatur fluminibus *Servi* & *Omirabih*, ad Meridiem Atlanti contigua est, ad Septentrionem vero terminatur, ubi fluvius *Servi* in fluvium *Omirabih* prolabitur. Vnde regio ipsa triangulari forma clauditur. Sunt in ea oppida, *Tefza*, & *Eska*, *Girbites*, aliaque.

Præcipuum hic flumen est *Tensif* sive *Tensif*, *Flumen Tensif*. *Ptolemæo* *Asama*. oritur in territorio *Maurocci* prope montem *Hanimee*, labitur versus occasum, nonnihil declinando ad Arctum; & descendit in mare non longe ab *Azaphi*. Dividit *Maurocum* & *Heam* ab *Hascora* & *Duccala*. Stratus est ponte lapideo, qui quindecim arcibus sustinetur, opus tota Africa celeberrimum, quod regi *Manfori* debetur, duas leucas ab oppido *Mauroco*. Recipit plures amnes, à Meridie plerosque, *Agmet*, *Niffin*, *Sifelmel*, & *Asinsimal*.

